

D.R. 20/92

Naskhah Sahih—Bahasa Malaysia

RANG UNDANG-UNDANG JUALAN LANGSUNG 1992

SUSUNAN FASAL

BAHAGIAN I

PERMULAAN

Fasal

1. Tajuk ringkas, mula berkuatkuasa dan pemakaian.
2. Tafsiran.
3. Pengawal, Timbalan Pengawal, dsb.

BAHAGIAN II

KEHENDAK SUPAYA MENDAPATKAN LESEN UNTUK MENJALANKAN PERNIAGAAN JUALAN LANGSUNG

4. Perniagaan jualan langsung hendaklah dijalankan hanya dengan lesen.
5. Pengemukaan permohonan untuk mendapatkan lesen.
6. Pemberian atau keengganan memberikan lesen.
7. Perniagaan jualan langsung yang berkenaan dengannya lesen tidak boleh diberikan.
8. Pembatalan lesen.
9. Pengenaan had sebagai ganti pembatalan lesen.
30. Kuasa untuk mengenakan syarat-syarat baru dan untuk mengubah atau membatalkan syarat-syarat.
11. Notis pembatalan lesen, pengenaan had atau pengubahan, pembatalan atau pengenaan syarat-syarat baru.
12. Penyerahan balik lesen.
13. Larangan ke atas penjalanan perniagaan jualan langsung apabila lesen dibatalkan, habis tempoh, atau diserahkan balik.
14. Pemberikuasaan untuk menjalankan aktiviti selepas pembatalan.

RANG UNDANG-UNDANG

Fasal

15. Pindaan atau perubahan dokumen konstituen pemegang lesen.
16. Rayuan terhadap keputusan Pengawal.

BAHAGIAN III

JUALAN PINTU KE PINTU DAN JUALAN PESANAN POS

17. Bertandang ke mana-mana premis bagi maksud merundingkan jualan pintu ke pintu.
18. Orang-orang yang merundingkan jualan pintu ke pintu hendaklah mengemukakan kad pengenalan dan kad kebenaran.
19. Jualan pesanan pos.
20. Kandungan iklan dalam jualan pesanan pos.
21. Kesalahan jika memberikan maklumat palsu dalam iklan.
22. Barang-barang hendaklah tersedia untuk diperiksa.

BAHAGIAN IV

KONTRAK JUALAN LANGSUNG

23. Kehendak-kehendak kontrak jualan langsung.
24. Kandungan kontrak jualan langsung.

BAHAGIAN V

TEMPOH BERTENANG DAN PENAMATAN

25. Barang atau perkhidmatan tidak boleh dihantarserahkan atau dilaksanakan dalam tempoh bertenang.
26. Penamatan kontrak.
27. Efek penamatan.

BAHAGIAN VI

PENGUATKUASAAN

28. Penyataan jawatan.
29. Kuasa untuk memasuki premis dan memeriksa dan menyita barang dan dokumen.
30. Kuasa untuk menangkap.
31. Penghalangan pegawai.
32. Waran boleh diterima walau apa pun kecacatan, dsb.

Fasal

33. Kuasa penyiasatan.
34. Penjalanan pendakwaan.
35. Pelucuthakan barang.
36. Tiada kos atau ganti rugi boleh didapati berbangkit daripada penyitaan.

BAHAGIAN VII

PELBAGAI

37. Terma-terma kontrak tertentu dilarang.
38. Kesalahan oleh pertubuhan perbadanan dan oleh pekerja dan ejen.
39. Penalti am.
40. Pengkompaunan kesalahan.
41. Bidang kuasa untuk membicarakan kesalahan-kesalahan.
42. Kuasa untuk memberikan pengecualian.
43. Perlindungan Pengawal, Timbalan Pengawal, Penolong Pengawal dan pegawai lain.
44. Peraturan-peraturan.

RANG UNDANG-UNDANG

bernama

Suatu Akta untuk membuat peruntukan bagi pelesenan orang-orang yang menjalankan perniagaan jualan langsung, bagi pengawalseliaan penjualan langsung, dan bagi perkara-perkara lain yang berkaitan dengannya.

[]

MAKA INILAH DIPERBUAT UNDANG-UNDANG oleh Duli Yang Maha Mulia Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti berikut:

BAHAGIAN I

PERMULAAN

1. (1) Akta ini bolehlah dinamakan Akta Jualan Langsung 1992 dan hendaklah mula berkuatkuasa pada tarikh yang ditetapkan oleh Menteri melalui pemberitahuan dalam *Warta*, dan tarikh yang berlainan boleh ditetapkan bagi mula berkuatkuasanya peruntukan yang berlainan dalam Akta ini.

Tajuk ringkas, mula berkuatkuasa dan pemakaian.

(2) Akta ini hendaklah terpakai di seluruh Malaysia dan hanya berkenaan dengan—

- (a) rundingan-rundingan yang dijalankan selepas tarikh mula berkuatkuasanya Akta ini, yang membawa kepada pembentukan kontrak-kontrak jualan langsung; dan
- (b) kontrak-kontrak jualan langsung yang dibuat selepas mula berkuatkuasanya Akta ini, walaupun

rundingan-rundingan yang membawa kepada pembentukan kontrak itu mungkin telah berlangsung sebelum tarikh itu.

(3) Akta ini tidaklah terpakai—

(a) jika pembeli atau bakal pembeli ialah suatu pertubuhan perbadanan; dan

(b) bagi apa-apa kontrak insurans dan insurans semula yang dikeluarkan oleh seseorang penanggung insurans yang didaftarkan di bawah Akta Insurans 1963.

Akta 89

(4) Peruntukan-peruntukan Akta ini tidaklah menjejaskan Akta Sewa Beli 1967, Akta Jualan Barang 1957, Akta Kontrak 1950 dan Akta Syarikat 1965, dan jika ada percanggahan di antara peruntukan-peruntukan Akta ini dengan peruntukan-peruntukan mana-mana Akta itu, peruntukan-peruntukan Akta ini hendaklah mengatasi.

*Akta 382
Akta 136
Akta 125*

Tafsiran.

2. Dalam Akta ini, melainkan jika konteksnya menghendaki makna yang lain—

"barang" ertinya tiap-tiap jenis harta alih selain daripada hak dalam tindakan, suratcara boleh niaga, syer, debentur dan wang;

"ditetapkan" ertinya ditetapkan melalui peraturan-peraturan;

"iklan" termasuklah tiap-tiap bentuk pengiklanan (sama ada atau tidak disertakan dengan atau berkaitan dengan perkataan lisan atau bertulis atau tulisan atau bunyi lain dan sama ada atau tidak terkandung atau dikeluarkan dalam sesuatu penerbitan) melalui pempameran notis atau dengan menggunakan katalog, senarai harga, label, kad atau dokumen-dokumen atau bahan-bahan lain atau melalui pertunjukan filem sinematograf atau gambar atau fotograf, atau dengan menggunakan radio atau televisyen, atau dengan apa-apa cara lain;

"jualan langsung" ertinya jualan dari pintu ke pintu dan jualan pesanan pos mengikut pengertian Akta ini;

"jualan pesanan pos" ertinya jualan barang atau perkhidmatan yang dijalankan oleh seseorang, sama ada sendiri atau melalui mana-mana orang yang diberikuasa olahnya, dengan menerima tawaran bagi kontrak jualan melalui pos;

"jualan pintu ke pintu" ertinya jualan barang atau perkhidmatan yang dijalankan dengan cara yang berikut:

(a) seseorang atau mana-mana orang yang diberikuasa olehnya—

(i) pergi dari satu tempat ke satu tempat selain daripada suatu tempat perniagaan yang tetap; atau

(ii) membuat panggilan telefon,

mencari orang yang bersedia untuk membuat kontrak sebagai pembeli bagi penjualan barang atau perkhidmatan; dan

(h) orang yang mula-mula disebut itu atau mana-mana orang lain selepas itu atau kemudiannya membuat perundingan dengan bakal pembeli dengan tujuan mewujudkan kontrak itu:

"Menteri" ertinya Menteri yang bertanggungjawab bagi perdagangan dalam negeri dan hal-ehwal pegguna;

"pembeli" ertinya orang yang kepadanya barang atau perkhidmatan dibekalkan atau akan dibekalkan di bawah sesuatu kontrak dan, jika hak-hak orang itu berpindah melalui kuasa undang-undang, termasuklah orang yang sekarang ini berhak kepada hak-hak itu;

"Pengawal", "Timbalan Pengawal" dan "Penolong Pengawal" masing-masing ertinya Pengawal Jualan Langsung, Timbalan Pengawal Jualan Langsung dan Penolong Pengawal Jualan Langsung yang dilantik di bawah seksyen 3;

"penjual" ertinya orang yang membekalkan atau bersetuju untuk membekalkan barang atau perkhidmatan di bawah sesuatu kontrak dan, jika hak-hak orang itu

berpindah melalui kuatkuasa undang-undang, termasuklah orang yang sekarang ini berhak kepada hak-hak itu;

"peraturan-peraturan" ertinya peraturan-peraturan yang dibuat di bawah Akta ini;

"perkhidmatan" termasuklah apa-apa jenis hak atau faedah kecuali pembekalan barang;

"tempat perniagaan tetap" ertinya—

- (a) berhubungan dengan penjualan barang, tempat di mana penjual biasanya menjalankan perniagaan atau tempat di mana barang-barang daripada perihal yang dengannya jualan itu berhubungan, atau barang-barang yang serupa perihalnya, biasanya ditawarkan atau dipamerkan untuk jualan dalam perjalanan perniagaan yang dijalankan di tempat itu;
- (b) berhubungan dengan penjualan perkhidmatan, tempat di mana penjual menjalankan perniagaan;

"tempoh bertenang" ertinya tempoh sepuluh hari yang bermula pada hari selepas tarikh pembuatan sesuatu kontrak jualan langsung.

Pengawal,
Timbalan
Pengawal.
dsb

3. (1) Menteri boleh melantik, daripada kalangan pegawai-pegawai awam, seorang Pengawal Jualan Langsung dan sekian bilangan Timbalan Pengawal Jualan Langsung, Penolong Pengawal Jualan Langsung dan pegawai lain sebagaimana yang perlu bagi maksud-maksud Akta ini.

(2) Pengawal hendaklah, tertakluk kepada arahan dan kawalan am Menteri, melaksanakan kewajipan-kewajipan yang dikenakan ke atasnya dan menjalankan hak-hak dan kuasa-kuasa yang diberikan kepadanya di bawah Akta ini dan peraturan-peraturan.

(3) Timbalan-Timbalan Pengawal, Penolong-Penolong Pengawal dan pegawai-pegawai lain yang dilantik di bawah subseksyen (1) hendaklah berada di bawah arahan dan kawalan Pengawal.

(4) Kecuali sebagaimana yang diperuntukkan dalam subseksyen (5), seseorang Timbalan Pengawal boleh melaksanakan segala kewajipan yang dikenakan ke atas dan menjalankan segala hak dan kuasa yang diberikan kepada Pengawal di bawah Akta ini.

(5) Kewajipan-kewajipan yang hendak dilaksanakan dan hak-hak dan kuasa-kuasa yang hendak dijalankan oleh Pengawal di bawah seksyen 6, 8, 9, 10, 11, 13 dan 14 hendaklah dilaksanakan dan dijalankan oleh Pengawal sendiri.

(6) Pengawal atau Timbalan Pengawal boleh melaksanakan segala kewajipan yang dikenakan ke atas dan menjalankan segala kuasa yang diberikan kepada Penolong Pengawal di bawah Akta ini atau peraturan-peraturan.

(7) Semua pegawai yang dilantik di bawah seksyen ini hendaklah disifatkan sebagai pengkhidmat awam mengikut pengertian Kanun Keseksaan.

N M B. Bab 45

BAHAGIAN II

KEHENDAK SUPAYA MENDAPATKAN LESEN UNTUK MENJALANKAN PERNJAGAAN JUALAN LANGSUNG

4. (1) Tertakluk kepada seksyen 14 dan 42, tiada seorang pun boleh menjalankan apa-apa perniagaan jualan langsung melainkan jika ia suatu syarikat yang diperbadankan di bawah Akta Syarikat 1965 dan memegang lesen yang sah yang diberikan di bawah seksyen 6.

Perniagaan
jualan
langsung
hendaklah
dijalankan
hanya dengan
lesen

(2) Mana-mana orang yang melanggar subseksyen (1) adalah melakukan suatu kesalahan dan, apabila disabitkan, boleh—

- (a) jika orang itu ialah suatu pertubuhan perbadanan, didenda tidak melebihi dua ratus lima puluh ribu ringgit dan, bagi kesalahan kali yang kedua atau yang berikutnya, didenda tidak melebihi lima ratus ribu ringgit;

(b) jika orang itu bukan suatu pertubuhan perbadanan. didenda tidak melebihi satu ratus ribu ringgit atau dipenjarakan selama tempoh tidak melebihi tiga tahun atau kedua-duanya dan, bagi kesalahan kali yang kedua atau yang berikutnya, didenda tidak melebihi dua ratus lima puluh ribu ringgit atau dipenjarakan selama tempoh tidak melebihi enam tahun atau kedua-duanya.

(3) Jika seseorang, yang menjadi pengarah, pengurus, setiausaha atau pegawai serupa itu yang lain dalam pertubuhan perbadanan itu, melakukan kesalahan di bawah seksyen ini menurut kuasa seksyen 38, dia boleh dikenakan penalti yang diperuntukkan di bawah perenggan (2) (b).

Pengemukakan permohonan untuk mendapatkan lesen.

5. (1) Sesuatu permohonan untuk mendapatkan lesen bagi rnenjalankan perniagaan jualan langsung yang disebutkan dalam seksyen 4 hendaklah dibuat dengan mengemukakan permohonan secara bertulis kepada Pengawal berserta dengan—

- (a) satu salinan memorandum dan perkara-perkara persatuan atau dokumen-dokumen konstituen lain yang di bawahnya pemohon telah ditubuhkan, yang ditentukan dengan sewajarnya melalui akaun berkanun yang dibuat oleh seorang pengarah pemohon itu;
- (b) satu salinan kunci kira-kira teraudit, akaun untung rugi dan laporan-laporan, jika ada, juruaudit dan pengarah-pengarah pemohon itu, jika berkenaan, yang terbaru;
- (c) suatu pernyataan tentang—
 - (i) nama, tempat dan tarikh penubuhan pemohon itu;
 - (ii) nama, tempat dan tarikh penubuhan perbadanan-perbadanan berkaitannya;
 - (iii) perniagaan utama dan bidang operasi pemohon dan perbadanan-perbadanan berkaitannya;

- (iv) nama dan alamat pengarah pemohon itu dan perbadanan-perbadanan berkaitannya, dan nama dan alamat pemegang-pemegang syer substansial, mengikut pengertian seksyen 69D Akta Syarikat 1965, pemohon itu dan perbadanan-perbadanan berkaitannya; dan
 - (v) skim pemasaran dan perdagangan atau skim pemasaran dan perdagangan dicadangkan pemohon itu berkenaan dengan perniagaan itu; dan
- (d) apa-apa maklumat atau dokumen lain yang dinyatakan oleh Pengawal bagi maksud-maksud memutuskan permohonan itu dan menentukan kesesuaian pemohon itu untuk mendapat lesen.
- (2) Bagi maksud-maksud subperenggan (1) (c) (iv), sebutan-sebutan mengenai suatu syarikat di bawah seksyen 69D Akta Syarikat 1965 hendaklah ditafsirkan sebagai termasuk suatu syarikat persendirian.
- (3) Pada bila-bila masa selepas menerima sesuatu permohonan dan sebelum permohonan itu diputuskan, Pengawai boleh, dengan notis bertulis, menghendaki supaya pemohon atau mana-mana orang yang menjadi atau akan menjadi pengarah atau pengurus pemohon itu memberikan maklumat atau dokumen tambahan.
- (4) Perkara-perkara yang dinyatakan di bawah perenggan (1) (d) atau kehendak-kehendak di bawah subseksyen (3) boleh berbeza di antara pemohon yang berlainan, atau pemohon daripada golongan, kategori atau perihal yang berlainan.
- (5) Sesuatu permohonan di bawah seksyen ini boleh ditarik balik pada bila-bila masa sebelum permohonan itu diluluskan atau ditolak.
- (6) Jika apa-apa maklumat atau dokumen tambahan yang dikehendaki di bawah subseksyen (3) tidak diberikan oleh pemohon atau pengarah atau pengurusnya, mengikut mana-mana yang berkenaan, dalam masa yang dinyatakan

dalam kehendak itu atau apa-apa perlanjutan masa itu yang diberikan oleh Pengawal, permohonan itu hendaklah disifatkan telah ditarik balik dan tidak boleh terus diuruskan, tetapi tanpa menjejaskan pembuatan permohonan baru oleh pemohon.

(7) Mana-mana orang yang memberikan maklumat atau dokumen yang palsu atau mengelirukan di bawah seksyen ini adalah melakukan suatu kesalahan.

Pemberian
atau
keengganan
memberikan
lesen.

6. (1) Apabila sesuatu permohonan bersena dengan dokumen-dokumen dan maklumat yang dikehendaki di bawah seksyen 5 diterima, Pengawal boleh memberikan lesen, dengan atau tanpa syarat, atau dia boleh enggan memberikan lesen tanpa memberi apa-apa sebab bagi keengganan itu.

(2) Pengawal boleh, pada memberikan Lesen di bawah subseksyen (1), menghendaki pemohon membayar apa-apa amaun fee yang ditetapkan.

(3) Bagi maksud subseksyen (2), fee yang berlainan boleh ditetapkan berkenaan dengan golongan, kategori atau perihal pemohon yang berlainan.

Perniagaan
jualan
langsung
yang
berkenaan
dengannya
lesen tidak
boleh
diberikan.

7. (1) Walau apa pun seksyen 6, tiada lesen boleh diberikan kepada seseorang yang berniat untuk menjalankan perniagaan jualan langsung yang melibatkan apa-apa skim atau perkiraan bagi penjualan atau pengedaran barang atau perkhidmatan yang menurutnya orang itu, dengan mendapat suatu balasan, memperoleh peluang untuk menerima suatu faedah wang yang tidak bergantung pada jumlah atau kuantiti barang atau perkhidmatan yang dijual atau diedarkan atau yang akan dijual atau diedarkan bagi maksud menjualnya semula tetapi yang diasaskan pada dorongan yang diberikan, olehnya sendiri atau orang-orang lain, supaya orang-orang lain turut menyertai skim atau perkiraan sedemikian.

(2) Mana-mana pemegang lesen yang, dalam perjalanan perniagaan jualan langsung yang mengenainya suatu lesen telah diberikan di bawah seksyen 6, mengendalikan atau turut serta, secara langsung atau tak langsung, dalam apa-apa skim atau perkiraan seperti yang

diperihalkan dalam subseksyen (1) adalah melakukan suatu kesalahan dan, apabila disabitkan, boleh didenda tidak melebihi dua ratus lima puluh ribu ringgit dan, bagi kesalahan kali yang kedua atau yang berikutnya, didenda tidak melebihi lima ratus ribu ringgit.

(3) Jika seseorang, yang menjadi pengarah, pengurus, setiausaha atau pegawai serupa itu yang lain dalam pertubuhan perbadanan itu, metakukan kesalahan di bawah seksyen ini menurut kuasa seksyen 38, dia boleh didenda tidak melebihi dua ratus lima puluh ribu ringgit atau dipenjarakan selama tempoh tidak melebihi tiga tahun atau kedua-duanya dan, bagi kesalahan yang kedua atau yang berikutnya, didenda tidak melebihi lima ratus ribu ringgit atau dipenjarakan selama tempoh tidak melebihi enam tahun atau kedua-duanya.

8. (1) Pengawal boleh membatalkan sesuatu lesen yang diberikan di bawah seksyen 6 jika dia berpuas hati bahawa— Pembatalan lesen.

- (a) pemegang lesen itu telah gagal mematuhi apa-apa obligasi yang dikenakan ke atasnya oleh atau di bawah Akta ini atau peraturan-peraturan;
- (b) pemegang lesen itu telah melanggar apa-apa syarat yang dikenakan di bawah lesen itu, atau apa-apa peruntukan lain lesen itu, atau apa-apa peruntukan Akta ini atau peraturan-peraturan, tanpa mengira bahawa tidak ada pendakwaan bagi kesalahan berkenaan dengan pelanggaran itu;
- (c) pemegang lesen atau mana-mana orang yang menjadi atau akan menjadi pengarah, pengurus, setiausaha atau pegawai serupa itu yang lain dalam pemegang lesen itu telah, sama ada berkaitan dengan permohonan bagi mendapatkan lesen, atau pada bila-bila masa selepas pemberian lesen itu, memberikan maklumat yang palsu, mengelirukan atau tak tepat kepada Pengawal;
- (d) kepentingan orang-orang yang berurusan dengan pemegang lesen atau kepentingan pembeli-pembelinya terancam dengan apa-apa cara, sama

RANG UNDANG-UNDANG

ada dengan cara pemegang lesen itu menjalankan atau bercadang hendak menjalankan perniagaannya atau kerana apa-apa sebab lain;

- (e) pemegang lesen telah berhenti menjalankan mana-mana satu atau lebih bidang perniagaan yang baginya ia dilesenkan;
- (f) suatu kompromi atau perkiraan dengan pemiutang-pemiutang telah dibuat berkenaan dengan pemegang lesen itu;
- (g) seorang penerima atau pengurus perniagaan pemegang lesen itu telah dilantik; atau
- (h) milikan telah diambil, oleh atau bagi pihak pemegang mana-mana debentur yang bercagarkan gadaian, akan mana-mana harta pemegang lesen itu yang terkandung dalam atau tertakluk kepada gadaian itu.

(2) Pengawal hendaklah membatalkan sesuatu lesen yang diberikan kepada pemegang lesen di bawah seksyen 6 jika dia berpuas hati bahawa—

- (a) suatu perintah penggulangan telah dibuat terhadap pemegang lesen itu; atau
- (b) suatu resolusi bagi penggulangan sukarela pemegang lesen itu telah diluluskan.

Pengenaan had sebagai ganti pembatalan lesen.

9. (1) Jika Pengawal berpuas hati bahawa ada alasan yang membolehkan kuasanya untuk membatalkan lesen dijalankan di bawah subseksyen 8(1) tetapi hal-hal keadaan tidaklah sedemikian rupa sehingga mewajarkan pembatalan, Pengawal boleh menghadkan lesen itu dengan—

- (a) mengenakan apa-apa batasan ke atas jangka masa lesen itu sebagaimana yang difikirkannya patut;
- (b) mengenakan apa-apa syarat sebagaimana yang difikirkannya wajar atau suaimanfaat bagi melindungi pembeli-pembeli atau bakal

pembeli-pembeli atau orang-orang lain yang berurusan dengan pemegang lesen itu; atau

(c) mengenakan batasan-batasan dan syarat-syarat itu kedua-duanya.

(2) Sesuatu batasan ke atas jangka masa sesuatu lesen tidaklah boleh sedemikian rupa sehingga membenarkan lesen itu terus berkuatkuasa selama suatu tempoh lebih lama daripada satu tahun dari tarikh batasan itu dikenakan; dan batasan itu boleh khususnya dikenakan dalam sesuatu hal apabila Pengawal berpendapat bahawa pemegang lesen patut dibenarkan membayar pembeli-pembelinya atau orang-orang lain yang berurusan dengannya dengan cara yang teratur.

(3) Syarat-syarat yang dikenakan di bawah seksyen ini boleh, khususnya—

(a) menghendaki pemegang lesen mengambil langkah-langkah tertentu atau tidak menggunakan atau meneruskan sesuatu bentuk tindakan atau menghadkan skop perniagaannya mengikut sesuatu cara tertentu; atau

(b) melarang pemegang lesen membuat apa-apa transaksi atau golongan transaksi, atau membenarkannya membuat transaksi-transaksi sedemikian tertakluk kepada apa-apa had atau syarat sebagaimana yang dinyatakan.

(4) Apa-apa syarat yang dikenakan di bawah seksyen ini boleh diubah atau dibatalkan oleh Pengawal dan apa-apa batasan yang dikenakan di bawah seksyen ini ke atas jangka masa Lesen boleh diubah tetapi tidaklah sehingga membenarkan lesen itu terus berkuatkuasa selama tempoh lebih lama daripada tempoh yang diperuntukkan dalam subseksyen (2).

(5) Kegagalan mematuhi mana-mana syarat yang dikenakan di bawah seksyen ini hendaklah menjadi alasan bagi pembatalan lesen tetapi tidaklah mentaksahkan apa-apa transaksi.

Kuasa untuk mengenakan syarat-syarat baru dan untuk mengubah atau membatalkan syarat-syarat.

10. Pengawal boleh pada bila-bila masa mengenakan syarat-syarat baru ke atas sesuatu lesen yang diberikan di bawah seksyen 6, atau mengubah atau membatalkan apa-apa syarat yang dikenakan ke atas lesen itu di bawah seksyen 6 atau di bawah seksyen ini, atau boleh mengubah atau membatalkan apa-apa syarat yang sudah sedia diubah di bawah seksyen ini.

Notis pembatalan lesen, pengenaan had, atau perubahan, pembatalan atau pengenaan syarat-syarat baru.

11. (1) Tertakluk kepada seksyen 12, jika Pengawal bercadang—

- (a) untuk membatalkan sesuatu lesen di bawah seksyen 8;
- (b) untuk menghadkan sesuatu lesen di bawah seksyen 9 atau mengubah apa-apa had atau syarat di bawah seksyen itu; atau
- (c) untuk mengubah atau membatalkan apa-apa syarat, atau mengenakan apa-apa syarat baru di bawah seksyen 10,

dia hendaklah memberikan pemegang lesen itu notis bertulis tentang niatnya untuk berbuat demikian, dengan menyatakan jenis tindakan yang dicadangkan dan alasan-alasan yang berdasarkannya dia bercadang mengambil tindakan sedemikian, dan dia hendaklah memberi pemegang lesen peluang untuk membuat representasi bertulis mengenainya dalam masa empat belas hari dari tarikh penyampaian notis itu.

(2) Selepas habis tempoh empat belas hari yang tersebut dalam subseksyen (1) dan selepas menimbangkan apa-apa representasi yang dibuat oleh pemegang lesen di bawah subseksyen itu, Pengawal hendaklah memutuskan—

- (a) sama ada hendak meneruskan tindakan yang dicadangkan itu;
- (b) sama ada tidak akan mengambil tindakan selanjutnya;
- (c) jika tindakan yang dicadangkan itu adalah untuk membatalkan lesen pemegang lesen itu, sama ada

hendak menghadkan lesen itu, sebagai ganti, di bawah seksyen 9; atau

(d) jika tindakan yang dicadangkan adalah untuk menghadkan lesen itu di bawah seksyen 9, atau untuk mengubah apa-apa had di bawah seksyen 9, atau untuk mengubah sesuatu syarat di bawah seksyen 10, sama ada untuk menghadkan atau mengubah had atau untuk mengubah syarat itu dengan cara yang berlainan.

(3) Pengawal hendaklah memberi pemegang lesen notis bertulis tentang keputusannya di bawah subseksyen (2), dan keputusan itu hendaklah mula berkuatkuasa dari tarikh notis bertulis itu disampaikan kepada pemegang lesen itu.

12. (1) Seseorang pemegang lesen boleh menyerahkan balik lesennya dengan menghantarnya kepada Pengawal bersama notis bertulis tentang penyerahan balik itu.

Penyerahan balik lesen.

(2) Penyerahan balik sesuatu lesen hendaklah mula berkuatkuasa pada tarikh Pengawal menerima lesen itu dan notis di bawah subseksyen (1) atau, jika suatu tarikh yang terkemudian dinyatakan dalam notis itu, pada tarikh terkemudian itu.

13. Jika pembatalan sesuatu lesen yang diberikan di bawah seksyen 6 telah mula berkuatkuasa, atau tempoh yang dikenakan ke atas sesuatu lesen sebagai had di bawah seksyen 9 telah habis, atau suatu penyerahan balik di bawah seksyen 12 telah mula berkuatkuasa, syarikat yang kepadanya lesen itu telah diberikan hendaklah dengan itu serta-merta berhenti menjalankan apa-apa perniagaan yang berkenaan dengannya lesen itu telah diberikan.

Larangan ke atas penjalanan perniagaan jualan langsung apabila lesen dibatalkan. habis tempoh, atau diserahkan balik.

14. Pengawal boleh, secara bertulis, memberikuasa sesuatu syarikat yang lesennya telah dibatalkan untuk menjalankan aktiviti-aktivitinya selama tempoh yang dinyatakan oleh Pengawal dalam pemberikuasaan itu, tetapi hanya bagi maksud menggulung hal-ehwalnya atau bagi maksud-maksud yang berfaedah kepada pembeli-pembeli atau orang-orang lain yang berurusan dengannya.

Pemberikuasaan untuk menjalankan aktiviti selepas pembatalan.

Pindaan atau perubahan dokumen konstituen pemegang lesen.

15. Tiap-tiap pemegang lesen hendaklah, dalam masa tiga bulan selepas pembuatan apa-apa pindaan atau perubahan kepada mana-mana dokumen konstituennya, memberi Pengawal butir-butir secara bertulis, yang ditentusahkan dengan sewajarnya melalui akuan berkanun yang dibuat oleh seorang pengarah pemegang lesen itu, tentang pindaan atau perubahan itu.

Rayuan terhadap keputusan Pengawal.

16. (1) Mana-mana orang yang terkilan dengan apa-apa keputusan Pengawal di bawah Bahagian ini boleh merayu kepada Menteri mengikut cara yang ditetapkan dalam masa satu bulan dari tarikh keputusan itu diberitahukan kepada orang itu.

(2) Keputusan Menteri atas sesuatu rayuan di bawah subseksyen (1) adalah muktamad.

BAHAGIAN III

JUALAN PINTU KE PINTU DAN JUALAN PESANAN POS

Bertandang ke mana-mana premis bagi maksud merundingkan jualan pintu ke pintu.

17. (1) Tiada seorang pun boleh bertandang ke mana-mana premis bagi maksud merundingkan jualan pintu ke pintu pada hari-hari dan di antara waktu-waktu yang ditetapkan.

(2) Mana-mana orang yang bertandang ke mana-mana premis bagi maksud merundingkan jualan pintu ke pintu hendaklah dengan segera menyatakan maksud lawatannya sebelum memasuki premis itu dan hendaklah meninggalkan premis atas permintaan penghuni premis itu atau mana-mana orang yang bertindak dengan kuasa sebenar atau tersirat daripada penghuni itu.

(3) Mana-mana orang yang melanggar seksyen ini adalah melakukan suatu kesalahan.

Orang-orang yang merundingkan jualan pintu ke pintu hendaklah menunjukkan kad pengenalan dan kad kebenaran.

18. (1) Mana-mana orang yang merundingkan jualan pintu ke pintu hendaklah menunjukkan kepada bakal pembeli—

- (a) kad pengenalan pendaftarannya; dan
- (b) kad kebenarannya yang hendaklah mengandungi apa-apa maklumat sebagaimana yang ditetapkan.

(2) Mana-mana orang yang gagal mengemukakan kad pengenalan pendaftaran negara atau kad kebenarannya atau yang mengemukakan kad kebenaran yang mengandungi apa-apa maklumat palsu atau yang mengelirukan adalah melakukan suatu kesalahan.

(3) Mana-mana orang yang mengeluarkan apa-apa kad kebenaran yang mengandungi apa-apa maklumat palsu atau yang mengelirukan adalah melakukan suatu kesalahan.

19. (1) Tiada seorang pun boleh membekalkan atau mengiklankan untuk membekalkan, melalui pesanan pos, apa-apa barang atau perkhidmatan kecuali mengikut Akta ini atau peraturan-peraturan. Jualan pesanan pos

(2) Mana-mana orang yang melanggar subseksyen (1) adalah melakukan suatu kesalahan.

20. (1) Sesuatu iklan oleh mana-mana orang untuk membekalkan barang atau perkhidmatan melalui pesanan pos hendaklah mengandungi— Kandungan iklan dalam jualan pesanan pos.

- (a) nama dan nombor lesen orang itu;
- (b) alamat orang itu, yang tidaklah boleh merupakan suatu nombor peti surat;
- (c) nombor telefon orang itu;
- (d) perihal terperinci barang yang ditawarkan atau perkhidmatan yang hendak diberikan;
- (e) tempat dan masa suatu sampel barang itu boleh diperiksa;
- (f) harga barang atau perkhidmatan itu;
- (g) kos penghantarserahan, jika ada, dan cara penghantarserahan, barang itu; dan
- (h) masa barang atau perkhidmatan itu dapat dijangkakan akan dihantarserahkan atau dilaksanakan.

(2) Mana-mana orang yang melanggar subseksyen (1) adalah melakukan suatu kesalahan.

Kesalahan jika membenkan maklumat palsu dalam iklan.

21. Mana-mana orang yang memberikan maklumat yang palsu atau mengelirukan dalam sesuatu iklan bagi pembekalan barang atau perkhidmatan melalui pesanan pos adalah melakukan suatu kesalahan.

Barang-barang hendaklah tersedia untuk diperiksa.

22. (1) Seseorang yang membekalkan barang melalui pesanan pos hendaklah menyediakan suatu sampel barang itu bagi pemeriksaan orang ramai di tempat-tempat dan pada masa-masa sebagaimana yang dinyatakan dalam iklan itu.

(2) Mana-mana orang yang melanggar subseksyen (1) adalah melakukan suatu kesalahan.

BAHAGIAN IV

KONTRAK JUALAN LANGSUNG

Kehendak-kehendak kontrak jualan langsung.

23. (1) Sesuatu kontrak berkenaan dengan jualan pintu ke pintu bagi pembekalan barang atau perkhidmatan yang nilainya akan ditetapkan, dan sesuatu kontrak berkenaan dengan jualan pesanan pos—

(a) hendaklah secara bertulis;

(b) hendaklah mengandungi, sebelum sahaja tempat yang diperuntukkan bagi tandatangan pembeli, pernyataan "KONTRAK INI ADALAH TERTAKLUK KEPADA TEMPOH BERTENANG SELAMA SEPULUH HARI KERJA" yang dicetak dengan huruf besar dalam cetakan yang tidak kurang daripada 18 poin Times; dan

(c) hendaklah ditandatangani oleh penjual dan pembeli kedua-duanya.

(2) Jika sesuatu kontrak berkenaan dengan jualan langsung dibuat oleh seseorang yang diberikuasa oleh penjual, orang itu hendaklah disifatkan sebagai penjual bagi maksud-maksud seksyen ini.

(3) Seseorang pembeli yang membuat kontrak yang baginya subseksyen (1) terpakai hendaklah diberi salinan pendua selepas sahaja kontrak itu dibuat.

(4) Kegagalan mematuhi subseksyen (1) hendaklah menjadikan kontrak itu batal.

(5) Kegagalan mematuhi subseksyen (3) hendaklah menjadikan kontrak itu boleh dibatalkan atas pilihan pembeli.

24. (1) Sesuatu kontrak berkenaan dengan jualan langsung hendaklah mengandungi butir-butir yang berikut:

Kandungan
kontrak
jualan
langsung.

- (a) perihal terperinci barang atau perkhidmatan yang hendak dibekalkan atau, jika kontrak itu membuat peruntukan bagi perjalanan kerja yang jenisnya dinyatakan, butir-butir terperinci kerja itu;
- (b) terma-terma kontrak bagi kontrak itu, termasuk jumlah balasan yang kena dibayar atau diberikan oleh pembeli, atau jika jumlah balasan tidak dapat dipastikan pada masa kontrak itu dibuat, cara jumlah itu akan dikira;
- (c) masa, tempat dan cara pembayaran hendaklah dibuat;
- (d) masa dan tempat bagi penghantarserahan barang-barang atau bagi pelaksanaan perkhidmatan itu; dan
- (e) notis dalam bentuk yang ditetapkan yang memberitahu pembeli tentang haknya untuk menamatkan kontrak itu sebelum habis tempoh bertenang,

(2) Kegagalan mematuhi subseksyen (1) hendaklah menjadikan kontrak itu batal.

BAHAGIAN V

TEMPOH BERTENANG DAN PENAMATAN

Barang atau perkhidmatan tidak boleh dihantar-serahkan atau dilaksanakan dalam tempoh bertenang.

25. (1) Kecuali dalam sesuatu hal apabila subseksyen (2) terpakai, tiada barang boleh dihantarserahkan dan tiada perkhidmatan boleh dilaksanakan di bawah sesuatu kontrak berkenaan dengan sesuatu jualan langsung sehingga tempoh bertenang telah luput.

(2) Jika seseorang pembeli, yang telah membuat kontrak berkenaan dengan sesuatu jualan langsung, telah menyampaikan suatu notis secara bertulis kepada penjual menghendaki penjual menghantarserahkan barang atau melaksanakan perkhidmatan pada bila-bila masa sebelum habis tempoh bertenang, dia hendaklah disifatkan telah menepikan haknya untuk menamatkan kontrak itu di bawah seksyen 26.

(3) Walau apa pun subseksyen (2), tiada notis di bawah subseksyen itu boleh disampaikan kepada penjual sebelum habis tempoh tujuh puluh dua jam dari masa kontrak itu dibuat.

(4) Tiada penjual atau orang lain boleh menerima apa-apa wang atau balasan lain daripada pembeli di bawah sesuatu kontrak yang dibuat di bawah Akta ini sebelum habis tempoh bertenang.

(5) Mana-mana penjual atau orang lain yang melanggar seksyen ini adalah melakukan suatu kesalahan.

Penamatan kontrak.

26. (1) Seseorang pembeli yang telah membuat kontrak berkenaan dengan sesuatu jualan langsung boleh menamatkan kontrak itu pada bila-bila masa sebelum habis tempoh bertenang dengan memberi penjual notis dalam bentuk yang ditetapkan menyatakan niatnya untuk menamatkan atau menarik diri daripada kontrak itu.

(2) Notis yang disebutkan dalam subseksyen (1) hendaklah disampaikan dengan menyerahkannya sendiri kepada penjual atau dengan menghantarnya melalui pos berdaftar akuan terima kepada alamat yang dinyatakan dalam kontrak itu.

(3) Jika notis diposkan mengikut subseksyen (2), notis itu hendaklah disifatkan telah disampaikan kepada penjual pada masa notis itu tiba di alamat yang dinyatakan dalam kontrak itu.

27. Jika notis penamatan telah diberikan menurut seksyen 26— Efek penamatan.

- (a) kontrak yang berhubungan dengan notis itu hendaklah disifatkan telah ditamatkan dengan persetujuan bersama dan tidak pernah berkuatkuasa; dan
- (b) apa-apa kontrak gerenti yang berhubungan dengan kontrak itu hendaklah disifatkan tidak pernah berkuatkuasa.

BAHAGIAN VI

PENGUATKUASAAN

28. Tiap-tiap pegawai yang dilantik di bawah Akta ini, apabila bertindak terhadap mana-mana orang di bawah Akta ini atau peraturan-peraturan, hendaklah dengan serta-merta menyatakan jawatannya dan hendaklah, apabila diminta, menunjukkan, kepada orang yang terhadapnya dia bertindak itu, apa-apa kad kuasa sebagaimana yang diarahkan oleh Pengawal supaya dibawa oleh pegawai itu. Penyataan jawatan.

29. (1) Jika seseorang Majistret berpuas hati atas maklumat bersumpah bahawa ada sebab-sebab munasabah untuk percaya— Kuasa untuk memasuki premis dan memeriksa dan menyita barang dan dokumen.

- (a) bahawa terdapat di mana-mana premis apa-apa dokumen atau barang yang pemeriksaannya mungkin akan menzahirkan keterangan tentang pelakuan sesuatu kesalahan di bawah Akta ini; atau
- (b) bahawa apa-apa kesalahan di bawah Akta ini telah, sedang atau hampir akan dilakukan di mana-mana premis,

dia boleh mengeluarkan waran, yang hendaklah berkuatkuasa selama tempoh tidak melebihi satu bulan, di bawah tandatangannya memberikuasa mana-mana pegawai yang dilantik di bawah Akta ini untuk memasuki premis itu, jika perlu dengan kekerasan, dan menggeledah premis itu.

(2) Mana-mana pegawai yang memasuki mana-mana premis di bawah kuasa suatu waran yang dikeluarkan di bawah subseksyen (1) boleh—

- (a) menghendaki mana-mana orang yang dijumpai di premis itu supaya memberinya apa-apa maklumat atau mengemukakan apa-apa barang atau dokumen yang berhubungan dengan apa-apa perniagaan jualan langsung dan mengambil salinan-salinan, atau salinan-salinan apa-apa catatan dalam, mana-mana dokumen sedemikian; dan
- (b) menyita dan menahan apa-apa barang dan dokumen yang dia ada sebab untuk percaya mungkin diperlukan sebagai keterangan dalam prosiding bagi sesuatu kesalahan di bawah Akta ini.

(3) Mana-mana pegawai yang menyita mana-mana dokumen dan barang pada menjalankan kuasa-kuasanya di bawah seksyen ini hendaklah, dengan seberapa segera yang mungkin, memberikan suatu senarai dokumen dan barang yang disita kepada orang yang daripadanya dokumen dan barang itu disita.

(4) Jika barang atau dokumen yang disita oleh seseorang pegawai pada menjalankan kuasa-kuasanya di bawah seksyen ini adalah, oleh sebab jenis, saiz atau amaunnya, tidak praktik dipindahkan dari tempat barang atau dokumen itu dijumpai, dia boleh dengan apa-apa cara mengelak barang atau dokumen itu dalam premis tempat barang atau dokumen itu dijumpai dan adalah menjadi suatu kesalahan jika mana-mana orang, tanpa kuasa yang sah, memecahkan, mengganggu atau merosakkan lak itu atau memindahkan barang atau dokumen itu atau cuba berbuat demikian.

(5) Mana-mana pegawai yang memasuki mana-mana premis menurut kuasa seksyen ini boleh membawa bersamanya mana-mana orang lain dan apa-apa kelengkapan yang didapatinya perlu; dan apabila meninggalkan mana-mana premis yang telah dimasukinya pada menjalankan kuasa-kuasanya di bawah seksyen ini dia hendaklah, jika premis itu tak berpenghuni atau jika penghuninya tidak ada buat sementara, rneninggalkannya kukuh daripada penceroboh seperti keadaannya semasa dia tiba di situ.

30. (1) Seseorang Penolong Pengawal boleh menangkap tanpa waran mana-mana orang yang dia ada sebab untuk percaya telah melakukan suatu kesalahan di bawah Akta ini jika orang itu enggan memberikan nama dan alamatnya atau jika ada alasan yang munasabah untuk percaya bahawa dia telah memberikan nama dan alamat palsu.

Kuasa untuk menangkap.

(2) Mana-mana orang yang telah ditangkap di bawah subseksyen (1) hendaklah selepas itu diperlakukan sebagaimana yang diperuntukkan melalui Kanun Prosedur Jenayah.

N.M.B. Bab 6.

31. (1) Mana-mana orang yang—

Penghalangan pegawai

- (a) menghalang mana-mana orang yang dilantik di bawah Akta ini yang bertindak menurut Akta ini;
- (b) gagal mematuhi apa-apa kehendak yang diarahkan dengan sepatutnya kepadanya oleh seorang pegawai yang diberikuasa di bawah seksyen 29; atau
- (c) tanpa sebab yang munasabah gagal memberi pegawai yang diberikuasa sedemikian apa-apa bantuan atau maklumat yang semunasabahnya dikehendaki oleh pegawai itu bagi maksud pelaksanaan fungsi-fungsinya di bawah Akta ini.

adalah melakukan suatu kesalahan dan boleh, apabila disabitkan, didenda tidak melebihi dua ribu ringgit atau dipenjarakan selama tempoh tidak melebihi enam bulan atau kedua-duanya.

(2) Jika mana-mana orang, dalam memberikan apa-apa maklumat seperti yang tersebut dalam subseksyen (1), membuat apa-apa pernyataan yang dia tahu atau ada sebab untuk percaya adalah palsu, dia adalah melakukan suatu kesalahan dan, apabila disabitkan, boleh dikenakan penalti yang tersebut dalam subseksyen itu.

(3) Tiada apa-apa jua dalam seksyen ini boleh disifatkan sebagai menghendaki seseorang menjawab apa-apa soalan atau memberikan apa-apa maklumat jika dengan berbuat demikian dia akan boleh didakwa.

Waran boleh diterima walau apa pun kecacatan, dsb.

32. Sesuatu waran yang dikeluarkan di bawah Akta ini adalah sah dan boleh diterima walau apa pun apa-apa kecacatan, kesilapan atau ketinggalan di dalamnya atau dalam permohonan bagi mendapatkan waran itu dan apa-apa barang atau dokumen yang disita di bawah waran itu hendaklah boleh diterima sebagai keterangan dalam apa-apa prosiding di bawah Akta ini atau peraturan-peraturan.

Kuasa penyiasatan.

33. Seseorang Penolong Pengawal adalah mempunyai kuasa untuk menyiasat pelakuan apa-apa kesalahan di bawah Akta ini.

Penjalanan pendakwaan.

34. Pendakwaan berkenaan dengan apa-apa kesalahan di bawah Akta ini atau peraturan-peraturan boleh dijalankan oleh mana-mana orang yang dilantik di bawah Akta ini.

Pelucuthakan barang.

35. (1) Segala barang yang disita pada menjalankan apa-apa kuasa yang diberikan di bawah Akta ini boleh dilucuthakkan.

(2) Suatu perintah bagi pelucuthakan atau bagi pelepasan apa-apa barang yang disita pada menjalankan apa-apa kuasa yang diberikan di bawah Akta ini hendaklah dibuat oleh mahkamah yang di hadapannya pendakwaan berkenaan dengan barang-barang itu telah diadakan dan suatu perintah bagi pelucuthakan barang-barang itu hendaklah dibuat jika dibuktikan sehingga mahkamah berpuas hati bahawa suatu kesalahan di bawah Akta ini telah dilakukan dan bahawa barang-barang itu ialah hal perkara atau telah digunakan dalam melakukan kesalahan itu, walaupun tiada seorang pun telah disabitkan atas kesalahan itu.

(3) Jika tidak ada pendakwaan berkenaan dengan apa-apa barang yang telah disita pada menjalankan apa-apa kuasa yang diberikan di bawah Akta ini, barang-barang itu hendaklah diambil dan disifatkan telah dilucuthakkan apabila habis tempoh satu bulan kalendar dari tarikh penyampaian notis kepada orang yang daripadanya barang-barang itu disita yang menunjukkan bahawa tidak ada pendakwaan dibuat berkenaan dengan barang-barang itu, melainkan jika suatu tuntutan terhadapnya dibuat sebelum tarikh itu mengikut cara yang dinyatakan dalam subseksyen (4), (5) dan (6).

(4) Mana-mana orang yang menegaskan bahawa dia ialah pemunya barang-barang yang disebutkan dalam subseksyen (3) dan bahawa barang-barang itu bukanlah barang-barang yang boleh dilucuthakkan boleh memberikan notis bertulis secara sendiri atau melalui ejennya yang diberikuasa secara bertulis kepada seseorang Penolong Pengawal bahawa dia menuntut barang-barang itu.

(5) Apabila notis yang disebutkan dalam subseksyen (4) diterima, Penolong Pengawal hendaklah merujuk tuntutan itu kepada Pengawal yang boleh mengarahkan supaya Penolong Pengawal itu merujuk perkara itu-kepada seorang Majistret bagi keputusannya.

(6) Majistret yang kepadanya sesuatu perkara dirujuk di bawah subseksyen (5) hendaklah mengeluarkan saman menghendaki orang yang menegaskan bahawa dia ialah pemunya barang-barang itu dan orang yang daripadanya barang-barang itu disita supaya hadir di hadapan Majistret itu, dan apabila mereka hadir atau jika mereka ingkar hadir, setelah dibuktikan penyampaian wajar saman itu, Majistret itu hendaklah terus memeriksa perkara itu dan apabila terbukti bahawa suatu kesalahan di bawah Akta ini telah dilakukan dan bahawa barang-barang itu ialah hal perkara atau telah digunakan dalam melakukan kesalahan itu hendaklah memerintahkan supaya barang-barang itu dilucuthakkan dan jika tidak terbukti sedemikian hendaklah memerintahkan supaya barang-barang itu dilepaskan.

(7) Segala benda yang terlucuthak atau yang disifatkan telah terlucuthak hendaklah diserahkan kepada Penolong Pengawal dan hendaklah dilupuskan mengikut arahan Pengawal.

(8) Jika apa-apa barang yang disita pada menjalankan kuasa-kuasa yang diberikan di bawah Akta ini adalah daripada jenis yang mudah musnah atau jika penjagaan barang-barang itu melibatkan belanja dan kesusahan yang tak munasabah, barang-barang itu boleh dijual pada bila-bila masa dan hasil jualan itu dipegang sementara menanti keputusan apa-apa pendakwaan atau tuntutan di bawah seksyen ini.

Tiada kos atau ganti rugi boleh didapati berbangkit daripada penyitaan.

36. Tiada seorang pun, dalam apa-apa prosiding di hadapan mana-mana mahkamah berkenaan dengan penyitaan apa-apa barang yang disita pada menjalankan atau berupa sebagai menjalankan apa-apa kuasa yang diberikan di bawah Akta ini, berhak mendapat kos prosiding itu atau, tertakluk kepada seksyen 35, mendapat apa-apa ganti rugi atau relif lain melainkan jika penyitaan itu telah dibuat tanpa sebab yang munasabah atau barangkali.

BAHAGIAN VII

PELBAGAI

37. (1) Sesuatu kontrak yang baginya Akta ini terpakai tidak boleh mengandungi—

Terma-terma kontrak tertentu dilarang.

(a) apa-apa peruntukan yang berupa sebagai menyingkirkan, menghadkan, atau mengubah-suaikan apa-apa hak yang diberikan kepada seseorang pembeli melalui Akta ini; atau

(b) apa-apa peruntukan daripada jenis yang dilarang oleh peraturan-peraturan.

(2) Jika sesuatu kontrak yang baginya Akta ini terpakai mengandungi suatu peruntukan yang berlawanan dengan subseksyen (1), peruntukan itu adalah batal dan penjual dan mana-mana orang yang diberikuasa olehnya untuk membuat kontrak itu adalah, setiap satunya, melakukan suatu kesalahan.

38. (1) Jika apa-apa kesalahan terhadap mana-mana peruntukan Akta ini atau peraturan-peraturan telah dilakukan oleh sesuatu pertubuhan perbadanan, mana-mana orang yang pada masa kesalahan itu dilakukan ialah seorang pengarah, pengurus, setiausaha atau pegawai serupa itu yang lain dalam pertubuhan perbadanan itu atau berupa sebagai bertindak atas mana-mana sifat sedemikian, atau dengan apa-apa cara atau hingga apa-apa takat bertanggungjawab atas pengurusan apa-apa hal-hwal pertubuhan perbadanan itu, atau membantu dalam pengurusan sedemikian, adalah melakukan kesalahan itu melainkan jika dia membuktikan bahawa kesalahan itu telah dilakukan tanpa diizinkan atau dibiarkan olehnya dan bahawa dia telah menjalankan segala daya usaha untuk mencegah pelakuan kesalahan itu sebagaimana yang sepatutnya dijalankan olehnya, setelah mengambil kira jenis fungsi-fungsinya atas sifat itu dan setelah mengambil kira segala hal keadaan.

Kesalahan oleh pertubuhan perbadanan dan oleh pekerja dan ejen.

RANG UNDANG-UNDANG

(2) Jika mana-mana orang (dalam subseksyen ini disebut "prinsipal") akan boleh dikenakan apa-apa hukuman atau penalti di bawah Akta ini kerana apa-apa perbuatan, ketinggalan, kecuaiian atau keingkaran, dia hendaklah boleh dikenakan hukuman atau penalti yang sama bagi tiap-tiap perbuatan, ketinggalan, kecuaiian atau keingkaran pekerja atau ejennya, atau pekerja ejen itu, jika perbuatan, ketinggalan, kecuaiian atau keingkaran itu telah dilakukan oleh pekerja prinsipal itu dalam perjalanan pekerjaannya, atau oleh ejen itu apabila bertindak bagi pihak prinsipal itu, atau oleh pekerja ejen itu dalam perjalanan pekerjaannya dengan ejen itu atau selainnya bagi pihak ejen itu.

Penalti am.

39. (1) Mana-mana orang yang melakukan suatu kesalahan di bawah Akta ini atau peraturan-peraturan yang baginya tiada penalti diperuntukkan dengan nyata boleh, apabila disabitkan, didenda tidak melebihi dua puluh lima ribu ringgit atau dipenjarakan selama tempoh tidak melebihi tiga tahun atau kedua-duanya, dan bagi kesalahan kali yang kedua atau yang berikutnya dia boleh didenda tidak melebihi lima puluh ribu ringgit atau dipenjarakan selama tempoh tidak melebihi lima tahun atau kedua-duanya.

(2) Mana-mana pertubuhan perbadanan yang melakukan kesalahan di bawah Akta ini atau peraturan-peraturan yang baginya tiada penalti diperuntukkan dengan nyata boleh, apabila disabitkan, didenda tidak melebihi satu ratus ribu ringgit, dan bagi kesalahan kali yang kedua atau yang berikutnya ia boleh didenda tidak melebihi dua ratus lima puluh ribu ringgit.

• (3) Jika seseorang, yang menjadi pengarah, pengurus, setiausaha atau pegawai serupa itu yang lain dalam sesuatu pertubuhan perbadanan adalah, menurut kuasa seksyen 38, melakukan suatu kesalahan di bawah Akta ini atau peraturan-peraturan yang baginya tiada penalti diperuntukkan dengan nyata, dia boleh dikenakan penalti yang diperuntukkan di bawah subseksyen (1).

40. (1) Pengawal atau Timbalan Pengawal boleh mengkompaun apa-apa kesalahan di bawah Akta ini atau peraturan-peraturan yang ditetapkan sebagai kesalahan boleh kompaun dengan menerima daripada orang yang semunasabahnya disyaki telah melakukan kesalahan itu sejumlah wang yang tidak melebihi amaun yang ditetapkan.

Peng-
kompaunan
kesalahan.

(2) Apabila bayaran diterima di bawah subseksyen (1), tiada prosiding selanjutnya boleh diambil terhadap orang itu berkenaan dengan kesalahan itu dan jika apa-apa barang telah diambil milik, barang-barang itu boleh dilepaskan, tertakluk kepada apa-apa syarat yang boleh dikenakan.

(3) Kuasa untuk mengkompaun kesalahan di bawah subseksyen (1) hendaklah dijalankan oleh Pengawal atau Timbalan Pengawal sendiri.

41. Walau apa pun apa-apa undang-undang bertulis yang berlawanan, sesuatu mahkamah Majistret Kelas Pertama hendaklah mempunyai bidang kuasa untuk membicarakan semua kesalahan di bawah Akta ini atau peraturan-peraturan dan untuk mengenakan hukuman penuh yang diperuntukkan bagi kesalahan-kesalahan itu.

Bidang kuasa
untuk mem-
bicarakan
kesalahan-
kesalahan.

42. (1) Menteri boleh, melalui perintah, mengecualikan, tertakluk kepada apa-apa syarat yang difikirkannya patut dikenakan, mana-mana orang atau golongan orang, atau apa-apa perniagaan jualan langsung atau golongan perniagaan jualan langsung daripada kesemua atau mana-mana peruntukan Akta ini atau peraturan-peraturan atas alasan—

Kuasa untuk
memberikan
pengecualian.

(a) bahawa hasil daripada perniagaan jualan langsung itu akan digunakan semata-mata bagi maksud khairat, kebajikan, kemasyarakatan, keagamaan atau pendidikan;

(b) bahawa orang yang hendak menjual barang atau membekalkan perkhidmatan itu ialah orang cacat;

- (c) bahawa orang yang hendak menjual barang atau membekalkan perkhidmatan itu ialah, dalam perjalanan biasa perniagaannya, dikehendaki membekalkan barang atau perkhidmatannya dengan cara transaksi jualan langsung bagi kemudahan pembeli-pembeli; atau
- (d) bahawa pemberian pengecualian kepada orang atau perniagaan juatan langsung itu tidak akan, pada pendapat Menteri, menjejaskan kepentingan pembeli-pembeli.

(3) Menteri boleh, pada bila-bila masa melalui perintah yang disiarkan dalam *Warta*, membatalkan apa-apa perintah yang dibuat di bawah subseksyen (1) jika dia berpuas hati bahawa pengecualian itu tidak lagi sesuai untuk terus diberikan.

Perlindungan
Pengawal,
Timbalan
Pengawal.
Penolong
Pengawal
dan pegawai
lain.

43. Tiada tindakan atau pendakwaan boleh dibawa, dimulakan atau dikekalkan di mana-mana mahkamah terhadap Pengawal. Timbalan Pengawal, Penolong Pengawal atau mana-mana pegawai lain yang dilantik sewajarnya di bawah Akta ini bagi atau atas sebab atau berkenaan dengan apa-apa tindakan yang diperintahkan atau dibuat bagi maksud menguatkuasakan Akta ini dan peraturan-peraturan, dan tiada guaman atau pendakwaan boleh dibawa di mana-mana mahkamah terhadap mana-mana orang lain bagi atau atas sebab atau berkenaan dengan apa-apa tindakan yang dibuat atau berupa sebagai dibuat olehnya di bawah perintah, arahan atau suruhan Pengawal, Timbalan Pengawal, Penolong Pengawal atau mana-mana pegawai lain yang dilantik di bawah Akta ini jika perbuatan itu dibuat dengan suci hati dan dengan kepercayaan munasabah bahawa tindakan itu adalah perlu bagi maksud yang diniatkan untuk dicapai olehnya.

Peraturan-
peraturan.

44. (1) Menteri boleh, dari semasa ke semasa, membuat peraturan-peraturan yang perlu atau suaimanfaat bagi memberikan kuatkuasa penuh kepada peruntukan-peruntukan Akta ini, bagi melaksanakan atau mencapai tujuan-tujuan dan maksud-maksud Akta ini atau mana-mana peruntukannya, atau bagi melaksanakan dengan lebih lanjut, lebih baik atau lebih mudah peruntukan-peruntukan Akta ini.

JUALAN LANGSUNG

(2) Tanpa menjejaskan keluasan subseksyen (1) peraturan-peraturan boleh dibuat—

(a) untuk mengawalselia pengeluaran, pengelilingan atau pengedaran dokumen, sama ada iklan, prospektus, pekeliling atau notis, yang mengandungi—

(i) pelawaan kepada mana-mana orang untuk menjadi peserta dalam skim-skim jualan langsung; atau

(ii) maklumat yang direncanakan untuk mendorong, sama ada secara langsung atau tak langsung, mana-mana orang untuk menjadi peserta dalam skim-skim sedemikian,

atau untuk melarang mana-mana dokumen sedemikian daripada dikeluarkan, dikelilingkan atau diedarkan melainkan jika dokumen itu mematuhi kehendak-kehendak tentang perkara-perkara yang hendaklah dimasukkan atau tidak dimasukkan ke dalam dokumen itu sebagaimana yang ditetapkan oleh peraturan-peraturan;

(b) melarang penjual atau mana-mana penjual, atau mana-mana peserta, dalam skim-skim jualan langsung, daripada—

(i) membekalkan apa-apa barang kepada seseorang peserta dalam skim itu;

(ii) membekalkan apa-apa kemudahan latihan atau perkhidmatan lain bagi peserta sedemikian;

(iii) memberikan apa-apa barang atau perkhidmatan di bawah sesuatu transaksi yang dibuat oleh peserta sedemikian;

(iv) sebagai suatu pihak kepada apa-apa perkiraan yang di bawahnya barang atau perkhidmatan dibekalkan atau diberikan seperti yang tersebut dalam subperenggan (i), (ii) atau (iii); atau

RANG UNDANG-UNDANG

- (v) menerima daripada mana-mana peserta sedemikian apa-apa bayaran, atau apa-apa akujanji untuk membuat pembayaran berkenaan dengan apa-apa barang atau perkhidmatan yang dibekalkan atau diberikan seperti yang tersebut dalam subperenggan (i), (ii), (iii) atau (iv) atau berkenaan dengan apa-apa barang atau perkhidmatan yang akan dibekalkan atau diberikan sedemikian.

melainkan jika (dalam mana-mana hal sedemikian) kehendak-kehendak sebagaimana yang ditetapkan dipatuhi;

- (c) melarang peruntukan-peruntukan atau golongan-golongan peruntukan tertentu daripada dimasukkan ke dalam sesuatu kontrak yang baginya Akta ini terpakai;
- (d) mengawalselia segala perkara yang berhubungan dengan skim-skim jualan langsung dan perjalanan jualan langsung;
- (e) menetapkan tatacara kelakuan bagi penjual atau peserta-peserta yang ada kaitan dengan sesuatu skim jualan langsung;
- (f) menetapkan kesalahan-kesalahan di bawah Akta ini atau peraturan-peraturan yang boleh dikompaun, amaun kompaun itu dan prosedur yang hendaklah diikuti dalam mengkompaunkan kesalahan-kesalahan; dan
- (g) menetapkan apa-apa jua yang boleh atau dikehendaki ditetapkan.

(3) Kuasa yang diberikan kepada Menteri di bawah seksyen ini boleh dijalankan untuk—

- (a) membuat pelanggaran mana-mana peruntukan peraturan-peraturan menjadi suatu kesalahan;

- (b) mengadakan peruntukan-peruntukan yang berlainan—
- (i) berhubungan dengan perihal atau golongan skim jualan langsung yang berlainan yang baginya Akta ini terpakai;
 - (ii) berhubungan dengan skim jualan langsung yang beroperasi atau pernah beroperasi pada tarikh yang ditetapkan dalam peraturan-peraturan; atau
 - (iii) berhubungan dengan perihal atau golongan peserta yang berlainan dalam skim-skim sedemikian.

(4) Bagi maksud seksyen ini, "peserta" ertinya orang-orang yang mengambil bahagian dalam skim-skim jualan langsung dan termasuklah pengedar, wakil jualan, ejen, peraih dan pembeli.

HURAIAN

Rang Undang-Undang ini bertujuan untuk membuat peruntukan bagi pelesenan orang-orang yang menjalankan perniagaan jualan langsung dan untuk mengawalselia perniagaan jualan langsung.

2. Bahagian I mengandungi perkara-perkara permulaan.

Fasal 1 rnengandungi tajuk ringkas dan bertujuan memberi Menteri kuasa untuk menetapkan tarikh mula berkuatkuasanya Akta yang dicadangkan. Fasal ini juga mengandungi peruntukan-peruntukan pemakaian.

Fasal 2 bertujuan mentakrifkan istilah-istilah tertentu yang digunakan dalam Rang Undang-Undang ini.

Fasal 3 bertujuan memberi Menteri kuasa melantik Pengawal Jualan Langsung, Timbalan Pengawal Jualan Langsung, Penolong Pengawal Jualan Langsung dan mana-mana pegawai lain sebagaimana yang perlu bagi maksud-maksud Rang Undang-Undang ini.

3. Bahagian II mengandungi peruntukan-peruntukan yang berhubungan dengan kehendak supaya mendapatkan lesen untuk menjalankan perniagaan jualan langsung.

RANG UNDANG-UNDANG

Fasal 4 bertujuan melarang penjalanan perniagaan jualan langsung melainkan jika orang yang menjalankan perniagaan itu ialah suatu syarikat yang diperbadankan di bawah Akta Syarikat dan dilesenkan di bawah Akta yang dicadangkan.

Fasal 5 mengandungi peruntukan-peruntukan yang berhubungan dengan pengemukakan permohonan bagi mendapatkan lesen untuk menjalankan perniagaan jualan langsung. Permohonan-permohonan hendaklah dikemukakan kepada Pengawal berserta dengan dokumen-dokumen dan maklumat yang dinyatakan dalam fasal itu.

Fasal 6 bertujuan memberi Pengawal kuasa untuk memberikan atau enggan memberikan lesen.

Fasal 7 menyatakan sejenis perniagaan jualan langsung yang berkenaan dengannya lesen tidak boleh dikeluarkan. Ini ialah suatu bentuk perniagaan jualan langsung yang biasanya dikenali sebagai "skim piramid". Di bawah skim ini, seseorang peserta menerima upah atau balasan yang pada asasnya bergantung pada bilangan peserta lain yang dapat didorong olehnya supaya menyertai skim itu. Banyaknya atau kuantiti jualan hanya sedikit sahaja atau tidak langsung relevan dalam menghitung amaun atau nilai upah atau balasan itu.

Fasal 8 bertujuan menyatakan keadaan-keadaan di mana Pengawal boleh membatalkan sesuatu lesen yang dikeluarkan di bawah *fasal 6*.

Fasal 9 bertujuan memberi Pengawal kuasa untuk mengenakan batasan ke atas jangka masa sesuatu lesen atau mengenakan syarat-syarat sebagaimana yang difikirkannya wajar atau suaimanfaat, atau kedua-duanya, sebagai ganti membatalkan sesuatu lesen. Kuasa ini boleh dijalankan jika dia berpuas hati bahawa, sungguhpun ada alasan bagi pembatalan sedemikian, ada hal keadaan yang tidak mewajarkan pembatalan.

Fasal 10 bertujuan memberi Pengawal kuasa untuk mengenakan syarat-syarat baru atau untuk mengubah atau membatalkan syarat-syarat yang dikenakan ke atas sesuatu lesen di bawah *fasal 6* atau untuk mengubah atau membatalkan syarat-syarat yang telahpun diubah di bawah fasal ini.

Fasal 11 menghendaki Pengawal memberikan notis bertulis kepada seseorang pemegang lesen bilamana dia bercadang hendak membatalkan sesuatu lesen, menghadkan sesuatu lesen, mengenakan suatu syarat baru atau mengubah atau membatalkan mana-mana syarat. Fasal ini juga bertujuan menghendaki Pengawal memberi pemegang lesen peluang untuk membuat representasi bertulis.

Fasal 12 bertujuan membenarkan pemegang lesen menyerahkan balik lesennya.

JUALAN LANGSUNG

Fasal 13 bertujuan melarang mana-mana orang menjalankan perniagaan jualan langsung selepas lesennya habis tempoh atau dibatalkan.

Fasal 14 bertujuan memberi Pengawal kuasa untuk memberikuasa sesuatu syarikat yang lesennya telah dibatalkan untuk menjalankan aktiviti, tetapi aktiviti sedemikian hanyalah dibenarkan bagi aktiviti yang perlu bagi maksud-maksud menggulung hal-ehwalnya atau bagi maksud-maksud yang berfaedah kepada pembeli-pembelinya.

Fasal 15 bertujuan menghendaki pemegang lesen memberikan butir-butir mengenai apa-apa pindaan atau perubahan pada mana-mana dokumen konstituennya kepada Pengawal.

Fasal 16 bertujuan memberi suatu peluang kepada mana-mana orang yang terkilan dengan sesuatu keputusan Pengawal untuk merayu kepada Menteri.

4. Bahagian III mengandungi peruntukan-peruntukan yang berhubungan dengan jualan pintu ke pintu dan jualan pesanan pos.

Fasal 17 dan *18* menyatakan kehendak-kehendak tertentu yang perlu dipatuhi oleh mana-mana orang yang bertandang ke mana-mana premis dengan tujuan merundingkan jualan pintu ke pintu. Antara lain, dia mesti menunjukkan kad pengenalannya dan kad kebenarannya. Dia juga mesti meninggalkan premis itu jika diminta berbuat demikian oleh penghuni premis itu.

Fasal 19 bertujuan melarang mana-mana orang membekalkan atau mengiklankan pembekalan apa-apa barang atau perkhidmatan selain daripada mengikut Akta yang dicadangkan atau peraturan-peraturan yang dibuat di bawah Akta yang dicadangkan.

Fasal 20 menyatakan perkara-perkara yang mesti dimasukkan dalam apa-apa iklan bagi pembekalan barang dan perkhidmatan melalui pesanan pos.

Fasal 21 bertujuan menjadikannya suatu kesiahan jika mana-mana orang memberikan maklumat palsu atau mengelirukan dalam apa-apa iklan bagi pembekalan barang dan perkhidmatan melalui pesanan pos.

Fasal 22 bertujuan menghendaki seseorang yang membekalkan barang melalui pesanan pos menyediakan suatu sampel barang itu bagi diperiksa oleh orang ramai.

5. Bahagian IV mengandungi peruntukan-peruntukan yang berhubungan dengan kontrak-kontrak jualan langsung.

Fasal 23 bertujuan memperuntukkan bahawa sesuatu kontrak berkenaan dengan jualan pintu ke pintu bagi pembekalan barang atau perkhidmatan yang nilainya akan ditetapkan dan sesuatu kontrak berkenaan dengan jualan pesanan pos hendaklah secara bertulis dan

hendaklah mengandung suatu pernyataan yang bermaksud bahwa kontrak itu adalah tertakluk kepada tempoh bertenang yang tidak kurang daripada sepuluh hari kerja. Tempoh bertenang diperuntukkan bagi memastikan bahawa pembeli tidak menjadi mangsa taktik mendesak yang digunakan oleh penjual-penjual yang tidak berpertimbangan atau ejen atau pekerjanya.

Fasal 24 menyatakan perkara-perkara tertentu yang mesti dimasukkan ke dalam kontrak jualan langsung. Ini termasuklah notis yang memberitahu pembeli tentang haknya untuk menamatkan kontrak sebelum habis tempoh bertenang.

6. Bahagian V mengandungi peruntukan-peruntukan lanjut berhubung dengan tempoh bertenang dan penamatan kontrak.

Fasal 25 bertujuan melarang penghantarserahan barang atau pelaksanaan perkhidmatan dalam tempoh bertenang. Bagaimanapun, jika pembeli, sebelum habis tempoh bertenang, menyampaikan notis kepada penjual menghendakinya menghantarserah barang atau melaksanakan perkhidmatan itu sebelum habis tempoh bertenang, pembeli akan disifatkan telah menepikan haknya untuk menamatkan kontrak di bawah *fasal 26*. Bagaimanapun, dia tidak boleh memberikan notis itu sebelum habis tempoh tujuh puluh dua jam dari masa kontrak itu dibuat.

Fasal 26 bertujuan membolehkan seseorang pembeli yang telah membuat sesuatu kontrak berkenaan dengan suatu jualan langsung menamatkan kontrak itu sebelum habis tempoh bertenang.

Fasal 27 menyatakan efek penamatan sesuatu kontrak.

7. Bahagian VI mengandungi peruntukan-peruntukan yang berhubung dengan kuasa-kuasa penguatkuasaan.

Fasal 28 bertujuan menghendaki tiap-tiap pegawai yang menguatkuasakan peruntukan-peruntukan Akta yang dicadangkan terhadap mana-mana orang untuk menyatakan jawatannya dan supaya menunjukkan kad kuasanya kepada orang itu apabila diminta untuk berbuat demikian.

Fasal 29 memperkatakan kuasa seseorang pegawai yang dilantik di bawah Akta yang dicadangkan untuk memasuki premis dan memeriksa dan menyita barang-barang dan dokumen-dokumen. Bagaimanapun dia mestilah terlebih dahulu mendapatkan waran daripada Majistret sebelum dia boleh memasuki mana-mana premis.

Fasal 30 bertujuan memberi seseorang Penolong Pengawal kuasa untuk menangkap, tanpa waran, mana-mana orang yang dia ada sebab untuk percaya telah melakukan suatu kesalahan terhadap Akta yang

JUALAN LANGSUNG

dicadangkan yang enggan memberikan nama dan alamatnya atau yang dia ada sebab munasabah untuk percaya telah memberikan nama atau alamat yang palsu.

Fasal 31 bertujuan menjadikannya suatu kesalahan bagi mana-mana orang menghalang mana-mana orang yang dilantik di bawah Akta yang dicadangkan dalam pelaksanaan fungsi-fungsinya.

Fasal 32, 33 dan 34 masing-masing memperkatakan keesahan waran-waran yang dikeluarkan di bawah Akta yang dicadangkan, kuasa-kuasa penyiasatan seseorang Penolong Pengawal dan perjalanan pendakwa kesalahan-kesalahan di bawah Akta yang dicadangkan.

Fasal 35 memperkatakan pelucuthakan barang-barang yang disita pada menjalankan kuasa-kuasa yang diberikan di bawah Akta yang dicadangkan, sementara *fasal 36* bertujuan memperuntukkan bahawa tiada seorang pun berhak mendapatkan kos atau ganti rugi berbangkit daripada penyitaan itu melainkan jika ia dibuat tanpa sebab munasabah atau barangkali.

3. Bahagian VII mengandungi peruntukan-peruntukan pelbagai.

Fasal 37 bertujuan melarang terma-terma tertentu dimasukkan dalam kontrak-kontrak berkenaan dengan jualan langsung.

Fasal 38 memperkatakan kesalahan-kesalahan yang dilakukan oleh pertubuhan-pertubuhan perbadanan dan oleh pekerja-pekerja dan ejen-ejen.

Fasal 39 menyatakan penalti am bagi kesalahan-kesalahan di bawah peruntukan-peruntukan Akta yang dicadangkan dan peraturan-peraturan yang dibuat di bawah Akta yang dicadangkan jika tiada penalti diperuntukkan dengan nyata bagi peruntukan-peruntukan itu.

Fasal 40 bertujuan memberi Pengawal dan Timbalan Pengawal kuasa untuk mengkompaun kesalahan-kesalahan tertentu di bawah Akta yang dicadangkan dan apa-apa peraturan yang dibuat di bawah Akta yang dicadangkan.

Fasal 41 bertujuan memberi Majistret Kelas Pertama bidang kuasa untuk membicarakan kes-kes di bawah Akta yang dicadangkan dan kuasa untuk mengenakan hukuman penuh bagi kesalahan itu.

Fasal 42 bertujuan memberi Menteri kuasa untuk mengecualikan orang-orang tertentu atau golongan-golongan orang tertentu atau perniagaan-perniagaan jualan langsung tertentu atau golongan-golongan perniagaan jualan langsung tertentu daripada peruntukan-peruntukan Akta yang dicadangkan atas mana-mana alasan yang dinyatakan dalam fasal itu.

RANG UNDANG-UNDANG

Fasal 43 mengandungi peruntukan-peruntukan bagi perlindungan Pengawal dan orang-orang yang dilantik di bawah Akta yang dicadangkan berkenaan dengan apa-apa perbuatan yang dilakukan bagi maksud menguatkuasakan peruntukan-peruntukan Akta yang dicadangkan.

Fasal 44 bertujuan memberi Menteri kuasa untuk membuat peraturan-peraturan bagi melaksanakan tujuan-tujuan dan maksud-maksud Akta yang dicadangkan.

IMPLIKASI KEWANGAN

Rang Undang-Undang ini tidak akan melibatkan Kerajaan dalam apa-apa perbelanjaan kewangan tambahan.

[PN.(U²)1474/III.]